

Querémoslos equí: VIVOS Y CON FUTURU

“Toa persona tien derechu a buscar asilu, y a disfrutar d'él, en cualesquier país, en casu de persecución”.
Art 14 de la Declaración Universal de los Derechos Humanos.

“Porque tuvi fame, y dístisme de comer; tuvi sede, y dístisme de beber; fui forasteru, y recoyístisme; tuvi desnudu, y cubristisme; enfermu, y visitástisme; tuvi na cárcel, y vinistis a mí”. (Mt 25, 35-36).

Les persones refuxaes nun son una problemática, sinón homes y muyeres con histories concretes. A lo llargo de meses fuimos testigos del tratu que tán sufriendo nes fronteres europees; tamos levantando muries nun continente que prometió nun llevantalos nunca más. La crisis humanitaria nun empieza n'Europa, empieza cola decisión tomada pola persona que tien de poner fin a la vida na so casa pa poder ser persona o, simplemente, pa poder ser.

La prohibú, les crisis alimentaries, la falta de derechos políticos y los conflictos armaos, principales causes qu'obliguen a les persones a abandonar les sos cases, nun son traxedies sinón consecuencias d'un sistema global económicu, políticu y social inxustu que non solo dexa a les persones nun segundu planu, sinón qu'amás afita diferencies y xerarquies ente persones. Acabar con estes diferencies ye una decisión política que los que nos gobiernen n'Europa y n'España nun tán dispuestos a tomar.

Por esta razón, ye responsabilidá de caún y caúna de nosotres plantanos énte les decisiones que los gobiernos tán tomando nun momentu nel que la población ta dando una respuesta solidaria exemplar. Como dixo'l Papa Francisco: *“Esti mundu necesita llorar: lloren los marxinaos, lloren los que queden nel bardial, lloren los despreciaos, pero los que llevamos una vida más o menos ensin necesidaes nun sabemos llorar”*.

Por esti motivu **los que roblamos esta carta, cristianos y cristianes de la Ilesia Asturiana, oponémosnos con contundencia al Tratáu robláu'l pasáu martes 8 de marzu ente la XE y el gobiernu turcu**, sumándonos a los comunicaos que yá emitieran la HOAC, CODOPA, CEAR y les organizaciones d'acción social de la Ilesia (Cáritas, JyP, CONFER y Sector Social de la Compañía de Xesús, CEE) por considerar qu'esti tratáu fraya los derechos humanos, les bases d'equidá y xusticia sobre les que s'asienten el derechu internacional humanitariu y les polítiques migratories y alcuerdos roblaos ente los estaos miembros que prohiben espresamente la devolución de persones que son oxetu de

persecución o víctimas de guerra; por creer que perpetúa'l conflictu y el sufrimientu deriváu d'él y, mui p'allá de solucionalo, pon la xestión de les vides de millones de persones nes manes del gobiernu de Turquía, qu'amosó abiertamente'l so despreciu a los derechos y llibertaes civiles y polítiques reprimiendo al pueblu kurdu y llindando la llibertá d'espresión reiteradamente dientro de les sos fronteres, cuando non consintiendo crímenes d'estáu.

Amás, **esiximos al nostru gobiernu en funciones, y futuros miembros del mesmu, que defenda nel Conseyu Européu la suspensión d'esti tratáu'l próximu día 18 de marzu y apelamos al nostru gobiernu autonómicu pa que faiga porque esti tema** y el sentir de la mayoría asturiana tea presente na axenda política, retomando'l so compromisu prioritariu cola cooperación al desarrollu y l'ayuda humanitaria dende'l puntu de vista presupuestariu y social.

Al tiempu, **animamos a toles persones, cristianes y non cristianes, a tar presentes y xuntes nes movilizaciones del día 16 de marzu** nes sos ciudaes d'orixe pa exercer la presión social necesaria pa que too esto salga p'alantre.

Ye obligación de los nuestros gobernantes aplicar les polítiques d'alcuertu a les demandes d'aquellos a los que representen y **nosotros y nosotres queremoslos equí: vivos y con futuru.**

Comunidad Adsis de Asturias

Comunidades Ictys

Comite Óscar Romero

Equipo Cáritas parroquial de Llaranes

Foro Gaspar García Laviana

Grupo Y de Asturias

Justicia y Paz Franciscana (Parroquia de San Antonio de Gijón)

y 364 firmas de Cristianos y cristianes de la Ilesia Asturiana *en documento adjunto.*